

Tiada Had Kelayakan Akademik Untuk Bertanding Pada Pemilihan Umno - SU Kerja Umno
Bernama
9 Oct, 2013

KUALA LUMPUR, 9 Okt (Bernama) -- Susulan pembatalan pencalonan seorang lagi tokoh akademik untuk bertanding jawatan anggota Majlis Tertinggi (MT) Umno, parti itu hari ini menegaskan ia tidak menetapkan sebarang kelayakan akademik untuk bertanding jawatan dalam parti.

Setiausaha Kerja Umno Datuk Ab Rauf Yusoh berkata sebaliknya Umno hanya meminta mereka yang berminat menjadi calon untuk memenuhi syarat yang ditetapkan iaitu pernah menjadi anggota jawatankuasa bahagian atau anggota MT selama tiga tahun.

"Umno ada proses tersendiri yang menghendaki sesiapa yang mahu bertanding di peringkat tertinggi perlu masuk ke peringkat bahagian terlebih dulu. Untuk mentadbir urus Umno di peringkat akar umbi ke peringkat tertinggi perlu ada pengalaman yang cukup," katanya kepada pemberita di sini hari ini.

Beliau mengulas pembatalan pencalonan Naib Ketua Pemuda Bahagian Selayang Prof Madya Dr Mohd Sazili Shahibi untuk jawatan anggota MT kerana tidak memenuhi syarat.

Pengguguran Mohd Sazili, yang juga Pengarah Institut Pemikiran dan Kepimpinan Melayu (IMPAK) Universiti Teknologi Mara (UiTM) daripada senarai calon MT, menimbulkan cakap-cakap bahawa golongan cerdik pandai tidak mempunyai tempat dalam parti itu.

Sebelum ini, Pengerusi Tetap Umno Cawangan Gombak Setia Prof Datuk Dr Zainul Fithri Othman yang juga Timbalan Naib Canselor Management & Science University (MSU), turut digugurkan pencalonan atas sebab sama.

Dalam perkembangan berkaitan, Ab Rauf memaklumkan calon kerusi Timbalan Pengerusi Tetap Pergerakan Puteri Umno, Salbiah Saari dari bahagian Tanjung Karang telah menarik diri dan dengan itu pencabarnya Nurul Huda Nordin Ahmad dari bahagian Tapah, menang tanpa bertanding.

Pengumuman rasmi mengenai perkara itu akan dibuat dalam masa terdekat oleh pengerusi Jawatankuasa Pemilihan, katanya.

Terdahulu, Ab Rauf menyerahkan buku senarai calon untuk dijadikan panduan oleh perwakilan dan petugas media bagi pemilihan peringkat sayap Pergerakan Wanita, Pemuda dan Puteri Umno pada Sabtu ini.

Buku itu yang mengandungi nama, nombor calon serta gambar individu yang menawarkan diri merebut jawatan diedarkan kepada perwakilan sejak semalam.

"Ini bagi memudahkan perwakilan tahu dan buat pilihan masing-masing. Ini kaedah baharu dalam pemilihan di mana ibu pejabat hanya mencetak kertas undi mengikut jawatan yang dipertandingkan dan bukan mengikut jumlah anggota yang bertanding," jelasnya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=984505>